

摘藻堂四庫全書薈要

集部

欽定四庫全書薈要

集部

誠齋集卷三

四

詳校官助教臣謝登雋



欽定四庫全書薈要卷一萬五千五百八十

集部

誠齋集卷三

宋 楊萬里 撰



江湖集

薄晚絕句

春氣吹人不作醒
病身感物底心情
斜陽也不藏人老
偏照霜髭一兩莖

暫出嫌喧可得除漫遊久廢未全無路逢鹽裏知城近
店有雞聲覺日晡

與主簿叔蔬飲聯句

巖含春味緊如椽酒入春風浪似山廷秀未信乾坤非細

物小吞螺浦半杯間昌英

永和遇風

未嫌春晚不多花只愛青原綠似瓜剩欲開懷納巖壑
可堪病眼着風沙待船小立看鷗沒倚杖微吟儘帽斜

客裏更無詩遣悶不愁兩鬢不成華

金甕花聯句

兩日風狂雨更顛取將暖去正衣單昌英金甕花發闌誰

事何用夜來如許寒廷秀

彥通叔祖約遊雲水寺二首

出門天色陰晴半着雨途間進退難知得招提在何許
只憑田父指林間

竹深草長綠冥冥有路如無久斷行風亦恐吾愁路遠

慇懃隔雨送鐘聲

和昌英叔久雨

積雨今晨也解休
殷勤日脚傍花流
半明衣桁烘梅潤
全為農家放麥秋
更著好風墮清句
不知何地頓閒愁
新晴佳處無人會
隔柳一聲黃栗留

憫旱

鳴鳩喚雨如喚晴
水車夜啼聲徹明
垂龍嬾睡未渠醒
阿香推熱呼不應
下田半濕高全坼
幼秧欲焦老差碧

書生所向便四壁賣漿逢寒步逢棘還家浪作飽飯謀
買田三歲兩無秋一門手指百二十萬斛量不盡窮愁
小兒察我慘不樂旋沽村酒聊相酌更哦子美醉時歌
焉知餓死填溝壑水車啞啞止復作

和蕭伯振禱雨

雲氣微昇又霍然虛疑數點長三川渚東杭稻今無雨
杜曲桑麻莫問天餓死何愁更平糴野夫半去只荒田
來辭託命長饒柄黃獨那能支一年

旱後柳寇又作

自憐秋蝶生不早只與夜蛩聲共悲眼邊未覺天地寬
身後更用文章為去秋今夏旱相繼淮江未靖柳江沸
餓夫相語死不愁今年官免和糴不

旱後喜雨四首

雲頭造次便能開雨脚商量半欲來舊日催詩元要雨
如今雨却索詩催

檢校西疇首忍回雨佳小恨較遲來抄雲浙玉何曾夢

只擬禾孫作粥材

竟夏興雲只苦風入秋後雨稍宜農怪來霹靂轟枯樹
知向前山起卧龍

密灑踈飄儘自由通宵到曉未須休平生愁聽芭蕉雨
何事今來聽不愁

秋日見橘花二首

花淨何須艷林深不隔香初開無處覓小摘莫令長春
落秋仍發梅蕪雪未強縹瓷汲寒甕淺浸一枝涼

不夜非關月無風也自香着花能許細落子不多長玉
糝開猶半金鬚撚更强得秋何恨晚映暑却生涼

題吉水余端蒙明府縣門飛鳧閣

塵外塵中儘靜喧閣前閣後且山川秋生踈雨微雲處
月仄青原白鷺邊眼冷庾樓聊復此人如葉令更差賢
從公欲往其如嬾着句無佳莫浪傳

題周鯁臣浩齋

浩翁曲肱一浩齋焉知廊廟與蒿萊此翁定復死不死

舊齋又新有賢子齋前種樹初如椽如今過雲欲造天
作人誰無半點氣草動風驚便心醉回山倒海不關身
古人與我各何人杉溪老人是翁友拈出問渠渠領否
送胡季永赴漕試

兔目着花官樣黃冰輪飄子秋風香誰騎瘦馬踏詞場
澹翁庭堦玉雪郎天於賢佞真不省不應阿翁有阿永
景升兒子漫谷量未識一丁惟啗餅阿永胸中幾許書
石渠庵有仍更餘毛錐半點不遽蔭羽鏃一脫無犀渠

當家衣鉢更誰付
鐫廳小借梯雲路
澹翁嚴冷縱不嬉
歸來膝上安文度

送瀛州先生元舉叔談命郡城

誰遣談天太逼真
取憎造物得辭貧
不妨小隱君平肆
戲與人間閱貴人

四十二叔祖母劉氏太孺人挽辭

夫人自七十有母尚期
願不遣千山計猶應一
病遲孝
留天下口身立女中師
到得君羹美翻令潁谷
悲緣夫人得

母計一慟而
病竟不起

四十九叔祖母朱氏孺人挽辭

憶哭清湘掾諸孤未裹頭盛年能素節凜氣却清秋眼
底生芻莫生前汎柏舟無齡還有德此母不應愁

黃太守元授挽辭二首

五馬新通貴千牛舊不全豈渠才作崇從古命懸天半
世風波裏清名玉雪邊諸郎俱偉器樞屬更人先

我忝通家子公如父行親一書雖不久半面遂無因旅

櫬千江遠銘旌兩竹新慶門寧有此造物豈其仁

夢亡友黃世永夢中猶喜談佛既覺感念不已因和夢李白韻以記焉二首

子在人每憎子亡憎者側自吾失此友但覺生意息猶解夢中來豈子餘此憶死生知有無賢聖或未測渾作白日看不記夜許黑尚憐紫鸞姿未舉先折翼只驚玉雪容冷面帶古色夢淚覺猶濕悲罷喜有得

去年客京都子去我未至得書不得面安用殷勤意猶

矜各未老相見當亦易不知此蹉跎交道遽云墜一杯
胡不仁埋此經世志弦絕諒何益蕙歎庸不賴吾聞佛
者流正以生作累夢中尚微言子豈悲世事

次主簿昌英叔鐏白韻

滴盡思親淚猶殘影弔形眼花渾作黑領底更能青少
也投三賦今焉忽一星此生成底事有脚不曾停

次晴望韻

秋水冬全落寒梅暖向榮煙林明又滅風鴈仄還平老

豈愁能避貧非嬾不營猶須鏟千嶂剩與放雙明

次出門韻

有酒何須富無車却好行眼中長得句身外豈關情
遠嶺寒逾瘦乾楓落更聲好懷非自悶且道向誰傾

次霜月韻

銀浦寒無浪金星澹不芒初看霜是月併愛月和霜
萬里除纖翳雙清作一光詩窮只欠許窮我未渠央

同主簿叔暮立

旋旋前山沒駸駸半臂寒鷗歸勢何嬾林近意先安待
月遲雲麼煩公小立看未知立玉笋何似立江干

晚望二首

月是小春春未至節名大雪雪何曾夕陽不管西山暗
只照東山八九稜

萬松不掩一楓丹煙怕山狂約住山却被沙鷗惱人損
作行飛去畧無還

次主簿叔晚霞

病眼何愁未苦佳
曉看霜了晚看霞
只驚天上三冬月
那得西河十里花
景與詩爭酣未退
興如水湧去難遮
却嫌醉墨欹傾甚
整整斜斜半似鷗

次乞米韻

魯公尚有粥為食
盧老今無僧作鄰
文字借令真可煮
吾曹從古不應貧
詩腸幸自無煙火
句眼何愁著點塵
俗子豈知貧亦好
未須容易向渠陳

夜雨不寐

雨急點不踈瓦乾聲可數滴破江湖夢合眼無復補更
長酒力短睡覺詩思苦已自不成眠如何更遭許

新寒

寒力欺誰得知儂典却衣暮禽差慰眼不作一行歸

和羅巨濟教授雪二首

天慳聊爾落地暖未教深猶放遙岑碧偏鳴密竹林似
供愁裏眼小惱客邊心詩卷開還闔清寒溢素襟

飛來須面旋欲墮更橫斜不遣詩人嬾惟禁酒力加鏤

冰初試手剪水便成花誰會歐蘇律吟邊別一家

次主簿雪韻

向來一雪亦草草天知詩人眼未飽相傳南風為雪骨
此言未試吾不曉昨日忽驚冬作春暖氣吹人軟欲倒
惟餘桃李未着花便恐蟄蟲偷出窖南風未了却北風
一夜吹翻青玉島今晨冷傍筆管生似妬吟邊事幽討
司寒作意欲再雪凍雀求哀不容禱令人還憶柳柳州
解道千山絕飛鳥誰教愛雪却嫌寒歡喜十分九煩惱

詩人凍死不足憐
凍死猶應談雪好
寄聲滕六何似休
淨盡將雲為儂掃

次秦少游梅詩

南枝外槁中不槁
未葉先花笑人倒
已從寒裏著詩愁
可復溪邊被花惱
非渠攪出百卉前
爾許清寒誰敢早
有花無雪花只俗
有雪無梅雪何好
冷蕊不風元自香
瘦柯寫月真如掃
但令一壑蒔橫斜
便挂竹皮為渠老
秦七蘇二冰玉詞
絕唱寒盟幾秋草
梅邊尚有句可搜

更撚衰髯仰青昊

次東坡先生蠲梅韻

梅花已自不是花
冰魂謫墮玉皇家
不餐煙火更餐蠟
化作黃姑瞞造物
后山未覺坡先知
東坡勾引后山詩
金花勸飲金荷葉
兩公醉吟許孤絕
人間姚魏漫如山
令人眼暗只欲眠
此花含香來又去
惱損詩人難覓句
月兼花影恰三人
欠箇文同作墨君
吾詩無復古清越
萬水千山一瓶鉢

次東坡先生用六一先生雪詩律令龜字二十韻舊禁玉月梨梅練絮白舞鵝鶴等字新添訪戴映雪高卧齧氈之類一切禁之

病身柴立手如龜不要人憐天得知一寒度夕抵度歲惡風更將乾雨吹作祥只解誑飢腹催老偏工欺短髭透屋旋生衾裏鐵隔窓也送硯中澌攬衣起看端不惡兩耳已作凍菌危似明還暗靜復響索我黃絹揮烏絲誤喜家貧屋驟富不道天巧人能為忽思向來旅京國

瘦馬斷鞭袍袖持紅金何曾夢得見繭生脚底粟生肌
殘杯冷炙自無分不是不肯叩富兒獨立西湖望東海
海神駕雪初來時眼花只怪失天地風橫併作翻簾幃
飛來峯在水仙國九里松無塵土姿只欠杖頭聘歡伯
安得醉倒衣淋漓猶遭天子呼野客催班聲裏趨丹墀
如今四壁一破褐雪花密密中披披詩肩渾作遠嶺瘦
詩思浪與春江馳茅柴乞暖那得冷聊復爾爾三兩卮
東坡逸足電電去天馬肯放羆牛隨君不見溧陽縣裏

一老尉一句曾饒韓退之

丙戌上元後和昌英叔李花

春暖何緣雪壓山
香來初認李花繁
露酣月藥蒼茫外
梅與山礬伯仲間
刺雨殘風底無賴
明朝後日不堪看
泥深小忍春遊脚
猶遣青童去一攀

又和春雨

向來一旱鬢成絲
敢道新年雨脚垂
未必催詩真強管
端令學稼失愁思
只今且莫傾三峽
此後時須示一犁

未愛少陵紅濕句可人却是道知時

和周仲容春日二絕句

春半花全褪詩人尚道遲惟應讀書苦聲調作吾伊
端憂只貧病不分又花時只說春何好猶堪入小詩

和周仲容春日二律句

饑民日夜去也有不荒田舊雨仍新雨今年勝去年未
嫌詩得瘦只苦茗妨眠花氣薰人醉來從茗箇邊

今晨晴頗嬾昨夜雨猶聲欲社燕先覺半春鶯未鳴詩

非一字苦句豈十分清參透江西社無燈眼亦明

和王才臣

新詩不但不饒儂便恐陰何立下風每與勝談千古事
不知撥盡一爐紅生兒底巧翁何恨得子銷愁我未窮
剩欲同留老三徑念渠何罪亦山中

得省榜見羅仲謀曾無逸策名夜歸喜甚通
夕不寐得二絕句

淡墨高垂兩客名夜歸到曉睡難成却緣二喜添三喜

聽得黃鸝第一聲

兩日陰晴較不常
嫩寒輕暖雜花香
今晨天色休休問
卧看紅光點屋梁

和蕭伯和韻

桃李何忙開又零
老懷易感掃還生
畧無花片經人眼
誰道春風不世情
睡去恐遭詩作祟
愁來當遣酒行成
子能覓句庸非樂
未必胸中有不平

又和風雨二首

東風未得顛如許，定被春光引得顛。
晚雨何妨畧彈壓，不應猶自借渠權。

風風雨雨入春窮，白白朱朱已眼空。
拚却老紅一萬點，換將新綠百千重。

和文遠叔行春

行脚宜晴翠，看雲恐夕黃。
何村不花柳，此社要柴桑。
一笑當誰領，同來得許忙。
老懷翻作惡，不剩半分狂。

和子上弟春電

電子何孤竹屋聲只於花事較無情青春已在殘紅裏
更着渠儂何似生

和蕭伯和春興

只道韶華不到儂不妨軟日媚柔風愁心自對春無味
老面可能花似紅逢着詩狂無酒聖又忘人厄或天窮
聖人枉索方兄價我與賢人也一中

又和聞蛙

春來真底好此輩政縱橫身作泥中計聲從雨後增北

人餐未慣南食眼猶生灰灑知虛實於渠似可行

又和二絕句

一冬寒不到深山豈有春來更會寒幸自趁晴行脚好
却嫌沙入破鞋間

剪剪輕風未是輕猶吹花片作紅聲一生情重嫌春淺
老去與春無點情

三月三日雨作遣悶十絕句

行春莫放一日一脩楔仍逢三月三忍遣晴光作陰雨

更將急濺浣春衫

出門看雨不能歸
借得青簑著片時
春染萬花知未了
雲偷千嶂忽何之

歸得茅齋松竹邊
看風看雨亦欣然
空簷知與堦何故
須把青苔滴似穿

舊與醪醕頗不疎
今春半朵未逢渠
千花一雨俱紅雨
問訊孤芳小住無

今年春事底匆匆
雨急風顛惱得儂
不見一林如許笋

猶嫌三日向來風

花餘只怪不愁聲
好語煩君細細聽
秧早不由田父懶
蠶遲端待柘陰成

遲日何緣似箇長
睡鄉未苦怯茶槍
春風解惱詩人鼻
非葉非花只是香

村落尋花特地無
有花亦自只愁予
不如卧聽春山雨
一陣繁聲一陣疎

報答春光酒一卮
貧中無酒着春欺
作詩細向東風道

未必東風肯要詩

却是春殘景更佳詩人須記許生涯
平田漲綠村村麥嫩水浮紅岸岸花

和羅武岡欽若醑醑長句

花飛十不啻五六青子團枝失紅簇
江南桃李摠成陰不論少城與韋曲
醑醑珍重不浪開晚堆綠雲點冰玉
體薰山麝非一臍水洗銀河費千斛
滴成小蓓密於糝亂走長條柔可束
醉眸須及月下看破鼻細從風處觸

先生未必被花惱偶與門人暮春浴為憐壓架千萬枝
小立傍邊領新馥剩拚妙語寵瓊蕤更掇清英釀酃醪
先生何得便杜門霜鬢猶煩玉堂宿

再和

春風一夜吹滕六旋落旋消不成簇只餘架上萬天花
照映清池三兩曲江東詩仙花下飲小摘繁枝糝醉玉
驚飛雪片萬許點亂落酒船百餘斛舊枝掠削自縈回
新枝奔迸無拘束詩仙詩滿雲夢胸那更相逢此花觸

只愁毛穎倦驅使一日屢向陶泓浴兩章洗盡眼底塵
箇字亦帶花邊馥憑誰說與柳柳州休道一聲山水綠
顛參佳句法如何夜雨何時對床宿

賀澹菴先生胡侍郎新居落成二首

清廟欹斜一笑扶歸來四壁亦元無可憐拙計輸餘子
住破僧房始結廬三逕非遙人自遠萬間不惡我何須
冥搜善頌終難好賀厦真成燕不如

眼高不肯住清都夢遶江南水竹居却入青原更青處

飽看黃本硬黃書剪裁風月聊堪醉
折洗乾坤正要渠
賜宅不應公得免未知此第似林廬

見周子充舍人叙懷

三年再謁一番逢兩舍相望幾訊通
便有好懷安得盡
不知造物底相窮公今貧賤庸非福
我更清愁惡似公
誤辱相期千載事雲泥政自未應同

和易公立投贈之句

日者論文各少年中間歲月似風旋
老來書冊惟生睡

少許生涯未苦賢好句撩人那得嬾勝流覓紙便爭傳
詩壇正欠風騷將君合為真不用權

和昌英主簿叔求潘墨

頗怯冥搜惱藏神却思瘞硯學元賓墨家何以得公重
詩債又来欺我貧鏡面松身紛楚楚金華笏樣本陳陳
嬾邊此寶端無用送似草玄揚子雲

之永和小憇資壽寺

石子密鋪徑竹莖踈作行不緣憇騶僕幾失此山房佛

像看都好林花靜自香未須清興盡歸更借僧床

過神助橋亭

下橋渾將野店看只驚脚底水聲寒不知竹外長江近
忽有高桅出寸竿

過大臯渡

隔岸橫洲十里青黃牛無數放春晴船行非與牛相背
何事黃牛却倒行

至永和

出城即便見青原正在長江出處天却到青原望城裏
樓臺些子水雲邊

自值夏小溪泛舟出大江

放溜山溪一葉輕山溪盡處大江橫舟中寂寂無人語
只有波聲及雨聲

和文明主簿叔見寄之韻二首

古聲彈已寡妙學足三多十載纔重見百年當幾何入
州非不肯出伏即相過安得看雲路金盆仄白河

黃九陳三外諸人總解詩甘心休作許苦語竟何爲所
向公同我何緣樣入時從來大小阮一笑更誰知

和濟翁見寄之韻二首

只有高爲累元無俗可離正緣隔少面添得許多詩杜
老吟邊樹山公醉處池猶須謀一笑天許又何時

四海皆兄弟何如真弟兄吾今有弟在眼只爲渠橫剩
欲驅濤壯猶應倒峽清青春不可又未欲傍長檠

和王才臣再病二首

燕外將心遠鶯邊與耳謀如何再卧病對此兩添愁赤
壁還坡老黃樓只子由二蘇三賦在一覽病應休

詩瘦如春瘦時乖抑命乖病過三日雨門掩半扉柴不
面何曾久於心便有懷端能暮出否溪水減南涯

閒居初夏午睡起二絕句

梅子留酸澣齒牙芭蕉分綠上窓紗日長睡起無情思
閒看兒童捉柳花

松陰一架半遮苔偶欲看書又嬾開戲掬清泉灑蕉葉

兒童誤認雨聲來

攜酒夜餞羅季周

夜深未要掩柴門
且放清風入綠尊
淡月輕雲相映着
淺黃帕子裏金盆

雨後獨登舍北山頂

山下生愁濕不除
山頭小立氣全蘇
自緣着脚高低別
萬壑清風豈是無

題羅巨濟教授蓮山堂

蓬萊藏室盛東都只着方書并老儒後來許事曉星踈
登車不落問何如廣文先生自有飯諸公衮衮端無羨
着脚金坡不作難問津木天何足辦作堂聊爾題蓬山
此豈有意亦偶然登瀛仙人多姓許未必先生肯為伍
書生饒舌定可憎此話姑置莫葛藤先生諸孫皆玉冰
誦書已作鸞鶴聲請來歌枕細細聽

和昌英叔夏至喜雨

清酣暑雨不緣求猶似梅黃麥欲秋去歲如今未半死

吾曹徧禱汗交流此生未用愠三已一飽便應哦四休
花外綠畦深沒鶴來看莫惜下邳侯

和昌英叔覓松枝作日棚

先人手種一川松為棟為梁似未中只合茅齋聽驅使
為公六月喚秋風

欲和新詩且撚髯岸巾百匝繞前簷茅齋或恐清陰薄
更遣蒼官去一添

秋夜不寐

秋氣侵人冷欲冰不由老境不愁生雨聲已遣儂無睡
更著寒蛩泣到明

元舉叔蓮花

不着芙蓉近路栽菰蒲深處却花開晚香特地清人骨
多謝西風得得來

昌英叔門外小樹木犀早開

觸鼻無從覓看林小綴黃旋開三兩粟已作十分香入
夜偏相惱攬先有底忙移床月枝下坐對畧傳觴

寄題張商弼葵堂堂下元不種葵花但取面
勢向陽二首

行盡葵堂西復東
葵天元自不曾逢
客來問訊名堂意
雪裏芭蕉笑殺儂

主人未肯便山林
賞月吟風酒更琴
每一登堂一揩眼
誰知半點向陽心

南溪暮立

溪影明霞新月彎
水聲亂石嫩沙間
欲歸小為魚兒住

更看跳波玉一環

晚望

病身似怯暮來風
老眼還驚霽後虹
落日偏明松表裏
好山分占水西東

誠齋集卷三

欽定四庫全書薈要卷一萬五千五百八十一

集部

誠齋集卷四

宋 楊萬里 撰

詩

江湖集

秋夜

挑落寒燈一點青
方知斜月半窓明
無端一陣秋聲起
喚作銅鉸蟹眼鳴

夜聞蕭伯和與子上弟讀書

少日耽書病得臞何曾燈火稍相踈如今老嬾那能許
卧聽鄰齋夜讀書

中秋雨過月出

欲遣清風掃亂雲先將一雨淨游塵今年大作中秋事
月色何孤我輩人照却八方還剩在看來千古許清新
不眠不惜明朝補報答孤光醉是真

和李天麟二首

學詩須透脫信手自孤高衣鉢無千古丘山只一毛句
中池有草子外目俱蒿可口端何似霜螯畧帶糟
句法天難祕工夫子但加參時且柏樹悟後豈桃花要
共東西土其如南北涯肯來談箇事分坐白鷗沙

寄題劉元明環翠閣二首

閣在青圍翠繞中何時我輩畧搘筇亦聞佳處無多子
只有千峯與萬峯

一夜秋聲惱井桐夢回得句寄西風詩成却問題詩處

正東山東復東

濠原路中

長亭短亭三復五總是兒時行底路尚憶天寒日小黃
先君前行我後顧如今悲不為途窮病鴈孤飛失老鴻
三年閉戶松風裏行路又還從此始

小雨

雨來細細復踈踈縱不能多不肯無似妒詩人山入眼
千峯故隔一簾珠

連嶺遇雨

肩輿正好看山色雨裏兩窓開不得此外只有書可觀
斜點又來濕書冊一日秋晴一日泥南翁此說似可疑
山寒却要日曝背吾衰不用雨催詩

題赤孤亭館

孤一作姑

數翁能令客眼明三峯端為此堂橫僕夫不敢催儂去
只道長沙尚八程

分宜逆旅逢同郡客子

在家兒女亦心輕行路逢人搃弟兄未問後來相憶否
其如臨別不勝情

袁州路遇晴

晴意久不果天容今一新如何半輪日銷却許多雲積
雨還休雨小春真似春客心君莫問山鳥亦欣欣

將至萍鄉欲宿為重客據館乃出西郊

哦詩渾忘路高低忽怪松梢與路齊準擬醉眠萍實驛
驛西西去更山西

將至醴陵

行盡崎嶇峽初逢
熨帖坡寒從平野有雨傍遠山多也
自長沙近其如此路何披文渾不惡
凍手奈頻呵

見張敬夫二首

克己今顏子承家小呂申
只愁無好手不道欠斯人
一別時非幾重來事
捻新祥琴聲尚苦可更話酸辛
不見所知久有懷何許
開百書終作惡千里為渠來
鄒魯期程遠風霜鬢髮催
不應師友地只麼遣空回

見張定叟

蜀士冠朝士最談蘇與張少公今是似相國未應亡黃閣如寒素青春已老蒼新功知更遠餘事出文章

宿龍回

大熟虛成喜微生亦可嗟禾頭已生耳雨脚尚如麻頃者官收米精於玉絕瑕四山雲又合奈爾老農家

見潭帥劉恭父舍人二首

雲霧開衡嶽波濤息洞庭是邦誰岳牧西掖一文星有

眼難人物斯人尚典刑如何閒處着不遣肅朝廷
道合寧嫌晚心期不用多於公猶未見此恨獨如何頗
辱談間問端須雪裏過門闌當曲逕許寄病身麼

蜀士甘彥和寓張魏公門館用予見張欽夫
詩韻作二詩見贈和以謝之

說着岷江士未逢眉已伸慙慙來相府邂逅得詩人不
是胸中別何緣句子新談今還悼昔喜罷反悲辛
夜把新詩讀燈前闔且開一行私獨喜兩脚不虛來天

似嫌梅晚冬初遣雪催與君問花信能繞百千回

和侯彥周知縣招飲

乘興山陰更灞橋人間此事久寥寥客心也欲將歸去
小為故人留一宵

和吳伯承提宮孟冬風雨

舊雨新更寒晝歇夜復隕我行十日泥屨跡故未泯吟
聲正酸苦已似琴促軫更遭雪作祟不由絃不緊與公
無詩債何得便見窘半生領盛名一面辱傾困眼底過

浮雲誰見柳下憫覓句許奇險有底惱肝腎開懷愛我
多落筆為渠盡獨憐禾頭耳可歎不可晒

題清江胡民瞻忍堂

俗物茫茫奈我何兒女昵昵不用呵先生笑問有酒麼
醉來得句自長哦家風孝友春風軟床無黃金且青簡
君不見多愁多惱張公藝枉却御前百餘字

除夕宿臨川戰平

一臘天頻雪千山梅未花終年不為客除夕却辭家雨

又垂垂落風仍故故斜難開愁裏眼只益鬢邊華

紀聞

人道真虛席心知必數公賓王欺釣築君實誤兒童天
在昇平外春歸小雪中何曾忘諸老渠自愛松風

又除夕絕句

紫陌相逢誰不疎青燈作伴未為孤何須家裏作時節
只問旗亭有酒無

丁亥正月新晴晚步二首

嫩水春來別樣光
草芽綠甚却成黃
東風似與行人便
吹盡寒雲放夕陽

急下柴車踏晚晴
青鞋步步有沙聲
忽逢野沼無人處
兩鴨浮沉最眼明

過安仁岸

野水上穿石踈林
不掩巢雨蒲拳病
葉風篠禿危梢短
脛知難續長腰強
自抄茲遊良不惡
物色困詼嘲

早行鳴山二首

淡淡青霜薄薄冰
曉寒端為作新晴
慙懃喚醒梅花睡
枝上春禽一兩聲

靈山未見見龜山
且捲詩書仔細看
春日却從年後暖
春風猶帶臘前寒

明發弋陽縣

燈市通宵沸朝來解一空
梅邊霜似雪霧外日如虹
句妙元非作人窮未必工
忽驚家已遠身在大江東

霧中見靈山依約不真

東來兩眼不曾寒
四顧千峯掠曉鬟
天欲惱人消幾許
只教和霧看靈山

題小沙溪鄭氏店江亭

隔水千山又萬山
大江仍合小溪灣
岸巾獨立春風裏
眼趁鳬雛下急灘

又題鄭店立春後一日

石壁仍叢竹
江亭更小樓
灘聲清客夢
燈影動詩愁
春日已虛過
元宵看又休
誰令不行樂
感破兩眉頭

上元日晚過順溪

恰恰元宵雨脚垂天公為我掃除之怪來平地寒如許
雪滿遠峯人未知

白沙買船晚至嚴州

重霧凝朝雨斜陽竟晚晴萬山江外盡一塔嶺尖明舟
小寧嫌窄途長已倦行子陵臺下水未酌意先清

題釣臺二絕句

斷崖初未有人蹤只合先生着此中漢室也無一杯土

釣臺今古幾春風

同學書生已冕旒
未將換與一羊裘
子雲到老不曉事
不信人間有許由

和周子中韻

清愁正爾喜逢兄
一笑那知客帝京
海氣不曾晴色好
梨花半落嫩寒生
刑書夜誦端何苦
詩句春來想不平
我亦有懷無處說
對床只欲為渠傾

都下無憂館小樓春盡旅懷二首

病眼逢書不敢開
春泥謝客亦無來
更無短計銷長日
且遶欄干一百回

不關老去願春遲
只恨春歸我未歸
最是楊花欺客子
向人一一作西飛

新熱送同邸歸客有感二首

日日思親未拜親
何時乞我自由身
同來客子送歸盡
更送後來無數人

瘦不緣詩不為春
只教懸磬未教行
清和天裏不歸去

六月長途作麼生

跋蜀人魏致堯撫幹萬言書

雨裏短檠頭似雪
客間長缺食無魚
上書慟哭君何苦
政是時人重子虛

桐廬道中

肩輿坐睡茶力短
野堠無人山路長
鴉鵲聲歡人不曾
枇杷一樹十分黃

金溪道中

野花垂路止人行
田水偏尋缺處鳴
近浦人家隨曲折
挿秧天氣半陰晴

將至建昌

梅雨芹泥路不佳
悶來小歇野人家
綠萍池沼垂楊裏
初見芙蓉第一花

見王宣子侍郎二首

不作伾文客
投閒可得辭
高名真自累了事
竟成癡到底
須良匠非渠更阿誰
莫嫌風雪惡
要試歲寒枝

老去渾多難愁來敢怨天生遭文字誤更結簿書緣苦
憶懸間榻難回雪後船三年纔一見百歲幾三年

都下和同舍客李元老承信贈詩之韻

論交何必星霜久白頭得似傾蓋友長安市上李將軍
挽弓舊不論石斗只今有子似渠長清夜讀書雪邊牖
雲端烽煙半點無怪來將軍不好武遺我驪珠三百顆
字字鐫鑱未會苟得得且看錢塘潮草草言攀渭城柳
朝家金印斗樣大情知不上書生肘儒冠多悞儂飽諳

毛錐焉用君知否便應早請終軍纓徑須繫取單于首
居延蒲類水如天吹作春風一杯酒歸來冠劍上凌煙
剩作功名落人口如何收斂許光芒也趁槐花黃裏走
獻璞雖真不救脛絕絃何如早停手人生正似風中花
榮悴昇沉豈非偶與君早賦歸去來名垂萬古知何有
不如耳熱歌嗚嗚醉帽欹傾衣不紐詩流唱和秋蟲鳴
僧房問答獅子吼儘令俗客不妨來白眼相看勿分割

新淦拋江

煙雨橫江水着天不曾夏滯似今年綠堤何用千株柳
只與行人礙過船

還家秋夕飲中喜雨

好風有意入金臺白酒無聲落玉杯秋雨亦嫌秋熱在
打荷飄竹爲人來

和李天麟秋懷五絕句

漫浪歸來歲又秋依然風月替人愁奉酬只麼隨緣句
嬾更雕肝與探鈎

雙井無人後山死只今誰子定傳燈老夫言語渾無味
不但秋來面可憎

小立南溪暮未還畧容老子照衰顏頗驚暝色來天外
未必秋聲在樹間

綴玉聯珠辱見投要知詞客解悲秋儂家幸自無煩惱
却被新詩解許愁

夜把新詩百遍開句如紅藥與蒼苔如何作計無端甚
押盡車斜始送來

送相士高元善二首

選官選佛兩悠悠元不關人浪自愁
洙泗生涯一春草
老夫作麼晚回頭

穉子煩君一一看丁寧莫道好求官
老來正要團樂坐
伴我秋風把釣竿

出城途中小憇

未到江頭已日斜山煙白處是人家
秋風畢竟無多巧
只把燕支點蓼花

題周子中司戶乘成臺三首

不煩營築便成臺自有青松不用栽
只道先生忙更懶也須一日一回來

只須獨立領秋光何用安排石鼓雙
平揖青原未為美更於竹外見長江

先生不削何須補上到乘成儘放懷
松竹尚堪驅使在為公一一捧詩牌

三辰硯屏歌

文發主管叔有一硯屏其石正紫中有日月相
並月中有桂其枝葉一一可數月傍有一星文
發因為三辰屏子因賦之

天光小紫日淡紅月光正與日相通一星雪白大於黍
走近月旁無半武吾聞三辰不並明如何日中見月星
霜後梨花定非瑞春秋獲麟不應貴君不見八月十五
夜向晨東方亭亭升火輪西有玉李伴金盆是時三辰
正如許君不着眼君莫論吾家大阮嗜文字看書到曉

那能睡三辰并光射窓几影落硯屏不容洗就中月輪
景特奇桂樹可數葉與枝炯如秋水涵荇藻天巧此豈
人能為懷璧未為罪借書未為癡公當什襲古錦袍如
何傳翫十手把不防夜半有力者

題文發叔所藏潘子其水墨江湖八境小軸
洞庭波漲

湖水吞天去湖風送浪還銀山何處是青底是君山

武昌春色

花外庾樓月鶯邊吳苑柳我欲問廢興春風獨無口

廬山霽色

彭澤收積雨廬山放嫩晴多情是瀑布只作雨中聲

海門殘照

萬里長江白半規斜日黃焦山渾欲到宛在水中央

太湖秋晚

水氣清空外人家秋色中細看千萬落戶戶水精宮

浙江觀潮

海湧銀為郭江橫玉繫腰吳儂只言點到老也看潮

西湖夏日

四月曾湖上荷錢劣可穿歸來開短紙十里已紅蓮

靈隱冷泉

小潘詩家子解作無聲詩八境俱妙絕冷泉天下奇

和文黼主簿叔惠詩之韻

薄宦江湖苦異途十年骨肉隔音書此行正爾見公面
又迫歸歟巾我車安得從容林下去相從漫浪物之初

念公不是漁竿客
合結絲綯立玉除

秋曉出郊二絕

初日新寒正曉霞
殘山賸水野人家
霜紅半臉金罍子
雪白一川蕎麥花

野菊相依露下叢
冷香自送水邊風
豐年氣象無多子
只在雞鳴犬吠中

送楊山人善談相及地理

相人何似相山難
慙愧渠儂眼不寒
木末涼風無半點

如何又欲跨歸鞍

胡英彥得歐陽公二帖蓋訓其子仲純叔弼
之語其一公自書之其一東坡書之英彥刻
石以遺朋友吾叔父春卿得一本有詩謝英
彥和馬萬里用其韻以簡英彥

聖處眇安在談者一何易注凡矜細巧岑鼎喪良貴羣
兒有新古六學無故意向來孟韓息不有歐蘇繼庸知
後死者未渠去聲鄉愿棄同時鷗鷗噪並起爪觜利兩公

察膏肓與世作薑桂扶山初作難破竹忽成勢雙明日
配月再立仁與義我有香一瓣恨不生並世厥今聖域
裏澹叟真守器怪來蘭玉秀渠以清白遺當家有學林
英彥道號曰學林滿腹惟典記人間市井言眼底冠讐視獨於

兩公帖費此平生喜麝煤叩山骨卧聽丁丁美今我竹
林老亦復拜嘉惠敢云賡絕唱頗欲與茲事朝來窓几
爽盡室問何瑞寶帖更新詩小子汝其志

寄題張敬夫春風樓

樂齋先生子張子獨立春風望洙泗四海無人萬古空
詠歌一聲滿天地不應東閣勝東山浮雲於渠了不關
只餘平生醫國手未忍旁觀縮袖間樓中古書積至斗
樓外春江綠如酒權門得似聖門寒萬派橫流獨回首
向來沂上瑟聲希由求相顧只心知至今留取一轉語
不知何詠亦何歸

四印室長句效劉信夫作呈信夫

廣文眼力自超然作室題詩字字妍憤世嫉邪聊爾爾

未必崔君真鶴言涪州別駕亦浪語渠家四印何曾鑄
漫向世人言養生涪州却向宜州去廣文平生不解愁
只將詩句敵清秋白浪如山風打頭江南江北一虛舟
坐上無羶惟有客青燈枉草強邊策萬言萬當不如默
誤人又指庭前柏

題劉德夫真意亭二首

湖上軒窓岸岸開誰家不傍讀書臺新亭自有人知處
只揀風煙好處來

淵明有意自忘言真處如今底處傳客子若來問真意
鏡中人影水中天

題蕭岳英常州草蟲軸蓋畫師之女朱氏之
筆二首

常州草蟲天下奇女郎新樣不緣師未應好手傳輪扁
便恐前身是郭熙

筆端春草已如生點綴蟲沙更未停淺着鵝黃作蝴蝶
深將猩血染蜻蜓

過雙陂

霜後寒溪清更清
冰如溪水水如冰
聞來也有窮忙事
問訊梅花開未曾

夜宿王才臣齋中睡覺聞風雪大作

天外風非細
風中雪更飛
夜聲吹不盡
寒客卧相依
一醉惺惺了
平生事事非
終年纔小款
明日又言歸

和羅巨濟山居十詠

世方爭造化
渠獨請真祠
意在昇沉外
官無冷熱宜
山

如輞川畫地似習家池若道閒居懶如何有十詩

老子朝慵起春風苦喚行晴邊猶着雪寒後未聞鶯偶
見千峯翠偏令兩眼明倦來渾欲睡無處避溪聲

只擁書千卷何須屋萬間新堂傍溪水大字署蓬山恰
有乘風客來分半日間自煎蝦蟆眼同淪鷓鴣斑

漫浪真堪老丁寧勿語人屐痕渾似齒巾角小於綸從
事故不惡賢人也似醇空瓶未應卧只恐惱比鄰

園花皆手植梅蘂獨禁寒色與香無價飛和雪作團數

枝橫翠竹一夜逸朱欄不惜吟邊苦收將句裏看
花柳春全盛池塘燕學飛晚晴還小立暮色不能歸草
遠天無壁苔深水有衣山居自清絕不必扣禪扉

酒客來中散詩僧約惠勤共聽茅屋雨添炷博山雲萬
事休多問三杯且一醺君看醉中語不琢自成文

秀溪何處好臘尾與春初山色梅邊淨人家竹裏居先
生來得得一笑意舒舒歸路無燈火冰輪挂嶺隅

且愛燈檠短寧論劍缺長芝蘭照春紫編簡著人香賀

監聊吳語昌黎豈楚狂豹文元炳蔚未信霧能藏
眼底無羣子毫端有百川脩名如揭月餘事亦凌煙刺
欲攜藤去相從聽雨眠恐渠即霄漢泉石罷潺湲

趙通判恭人周氏輓辭

趙名永年
穎人

早與梁鴻隱中隨士會歸一門忠義氣千古日星暉紫
誥金花詔青燈錦字機西風今夜月墳是昔人非

老眼廢書有歎

老矣書無分居然眼有花墨兵非死友綠醕且生涯雪

後霜逾勁吟邊帽只斜小兒知我懶夜誦故喧譁

過蕉坑

楓葉乾餘尚小紅
苔花飛盡不留茸
經旬欲雪還無雪
只作清寒惱殺儂

和九叔知縣昨遊長句

詩窮不但兩鬢霜
白髮緣愁千丈長
一年強半走道路
歸來又見橘柚黃
不如南鄰更北里
醉折梅花照溪水
扶藜時躡大阮踪
覓句深叅少陵髓
昨遊過眼不可留

今朝欲再亦何由
新詩已落萬人口
不應更着錦囊收

送王無咎善邵康節皇極數二首

安樂窩中書一篇
君從何許得真傳
我無杜曲桑麻在
也道此生休問天

識盡江淮諸貴人
歸來盧水一番新
問渠福將今誰子
容我昇平作倖民

誠齋集卷四


謹案卷三第一頁後四行蕨含春味緊如椽按埤
雅蕨初生狀如雀足之拳此椽字疑訛

第十九頁前六行黃牛無數放春晴原本無訛元
據別本改

第十九頁後七行古聲彈已寡按枚乘七發九寡
之珥以為約注約與的同琴徽也此已字當作
九

卷四第五頁前一行有眼難人物斯人尚典刑按

二人字疑有一訛



總校官庶吉士臣張能照

校對官庶吉士臣陳文樞

謄錄監生臣沈元錡

欽定四庫全書薈要

集部

誠齋集卷五

六

詳校官助教臣謝登雋



欽定四庫全書薈要卷一萬五千五百八十二

集部

誠齋集卷五

宋 楊萬里 撰

詩

江湖集

看雪

揉雲剪水作風毬
夜落連明肯便休
舊說六花元未試
偶看一片上駝裘

送曾秀才歸永豐

白白茅柴強作春
青青燈火夜相親
超然似子真翹楚
舊矣逢人誦過秦
覓舉不應專嗜古
能文安得却嫌貧
射科速化誰無術
誤向南溪更問津

寄題鄒公橋

吾儕一事辦不曾
鄒公一橋了此生
省齋先生三大字
此橋便有千載意
今年天亦與護持
桃花春水不多肥
濟川題柱吾無夢
夢借新橋作釣磯

贈曾相士二首

富貴真成一聚塵
飢寒選得萬年名
心知那有揚州鶴
更問儂當作麼生

拋了儒書讀相書
却將冷眼看諸儒
曾生肯伴誠齋否
共箇漁舟入五湖

題蕭端虛和樂堂

玉筍風回峽山雨
兩公對床方軟語
少公一生吟樣臞
長公半醉少公扶
白頭兄弟不多有
面如橘紅不關酒

紫荊花開連理枝孝友未要時人知

昌英知縣叔作歲賦瓶裏梅花時坐上九人

七首

銷冰作水旋成家猶似江頭竹外斜試問坐中還幾客
九人而已更梅花

膽樣銀瓶玉樣梅北枝折得未全開為憐落莫空山裏
喚入詩人几案來

酒兵半已卧長瓶更看梅兄巧盡情醉插梅花望松雪

人間曾有箇般清

寒盡春生夜未央酒狂狂似醒時狂吾人何用餐煙火

揉碎梅花和蜜霜

予取糖霜芼以梅花食之其香味如蜜漬青梅小苦而甘

衣染龍涎與麝臍裁雲剪月作冰肌小瓶雪水無多子

只簪橫斜一兩枝

雪凍霜封稍欲殘慙勤折向坐中看綺疏深閉珠簾密
不遣花愁半點寒

梅香不是不寒清參遍橫枝酒未醒夢入西湖疎影裏

覺來失却冷泉亭

戊子正月六日雷雨感歎示壽仁子

今晨忽雷雨天地又發春草木閱紅綠生意密已欣蟄
蟲且徐動餘寒未全仁先生起裹頭三歎一再顰春風
吹萬物不吹先生貧靖怨一束書只博兩袴塵自倚文
字工意取造物嗔小兒在傍笑笑我浪苦辛去年作客
子椒柏羨主人在家不差勝更用愁此身先生亦一莞
我不如兒真為我滿眼酤不問醅與醇杖頭日百錢無

錢借諸隣不然衣可典及此花柳新

人日詰朝從昌英叔出謁

四序各自佳要不如春時何必花與柳始愛春物熙今
晨駕言出從公南山西泥軟屨自愜風嫩面不知寒草
動暖芽晴山餘雨姿水日亦相媚感紋生碎暉鳥聲豈
為我我聽偶自怡出門初憚煩載塗乃忘歸但令我意
適豈校出處為路人見我揖屬我有所思我不見其面
信口聊應之徐悟恐忤物欲謝已莫追我率或似傲彼

惛獨得辭

暮宿半途

朝日在我東夕日在我西我行日亦行日歸我未歸勢
須就人宿遠近或難期平生太踈放似黠亦似癡如今
何日行不以衾枕隨幸逢春小暄倒睡莫解衣借令今
夕寒我醉亦不知

次日醉歸

日晚頗欲歸主人苦見留我非不能飲老病怯觥籌人

意不可違欲去且復休我醉彼自止醉亦何足愁歸路
意昏昏落日在嶺陬竹裏有人家欲憇聊一投有叟喜
我至呼我為君侯告以我非是俛笑仍掉頭機心久已
盡猶有不下鷗田父亦外我我老誰與遊

上元夜里俗粉米為繭絲書吉語置其中以
占一歲之福禍謂之繭卜因戲作長句

去年上元客三衢衝雨看燈強作娛今年上元家裏住
村落無燈惟有雨隔溪叢祠稍簫鼓不知還有遊人否

兒女炊玉作繭絲中藏吉語默有祈小兒祝身取官早
小女只求蠶事好先生平生笑兒癡逢場亦復作兒嬉
不願着腳金華殿不願增巢上林苑只哦少陵七字詩
但得長年飽喫飯心知繭卜未必然醉中得卜喜欲顛
送蕭仲和往長沙見張敬夫

蕭家伯氏難為兄蕭家仲氏難為弟御史子孫今有誰
眼中乃見此二士阿兄采蘭壽梅堂阿弟東書參蜀張
聖明九鑰天為守玉匙密付蜀張手子到長沙渠問儂

為言真成一老翁功名妄念雪銷了只愛吟詩惱魚鳥
子歸好在中秋前看子新年勝故年

送鄒元升歸安福

我昔見子廬溪南炯如玉雪照晴嵐子今訪我南溪北
凜如駉驥成骨骼袖中文字細作行讀來病眼生寒光
尖新句子入時樣故應破陣翰墨場春風春雨春山路
喜子能來愁子去故人一別二十年且對青燈夜深語
和昌英叔雪中春酌

南溪春寒強似冬南溪春水走玉虹雷公戲手行春雪
詩人嘲詞便飛屑只嫌春雪趁春雷春容正要渠栽培
凍作玉花銷作雨多般點綴春庭戶酒杯如海醉即休
醉中看雪忘却愁如何呼酒不痛飲可令詩肩受淒凜
少時狂殺老更狂長恐此意墮渺茫醉鄉有地分一席
且與先生十分梨花注大白

送劉生談命

學兵先學策談命先談格君看前輩富貴人豈與寒士

校日辰星家者流有劉子進人退人若翻水談何容易
驗他年却是直言差可喜

和曾克俊惠詩

眼底春光正入年社前燕子已言旋雨多厭聽鳩夫婦
病起全踈酒聖賢舊喜作詩今已懶君能得句我先傳
畧無好語償嘉惠只麼從權只麼權

和胡侍郎見簡

花邊雪裏撚霜髭怪底詩來妙一時聊復小吟開後悟

便應大用到前疑先生此曲難先和着句如棋且着持
每望南雲尺有咫其人甚遠只嗟咨

贈彭雲翔長句

讀書臺邊士如雲盧溪門下士如麟定知此地難為士
後來之秀說彭子雪裏能來訪我為當堦下馬雪滿衣
贈我文章無不有出入歐蘇與韓柳如今場屋號作家
相州紅纈洛中花豈如彭子有律令會當一書取張景
今年誰子司文柄

和賀升卿雲菴升卿嘗上書北闕既歸去歲
寄此詩今乃和以報之

賀子胸中自有山結菴山底更雲間遺才只道今無許
此士如何尚着閒未應萬言直杯水向來九虎守天關
莫嫌久不還詩債詩債從來隔歲還

送昌英叔知縣之官麻陽

政坐詩無半點塵天令着句錦江春遠民蒙惠即真學
漫仕緣親非為身許日相從今恨少先生此別我誰鄰

不應更作徒勞歎廊廟方尋密縣人

和周子中病中代書之韻兼督胡季文季永
游山之約

吟外今何病愁邊我索居昔無今樣嬾新欠故人書只
說遊山去誰令作計踈衡廬負我輩我輩負衡廬

除夕前一日絕句

雪留遠嶺半尖白雲漏斜陽一線黃天肯放晴差易耳
慙慙剩覓幾朝霜

己丑上元後晚望

雪裏晴偏好寒餘暖尚輕山煙春自起野燒暮方明又
是元宵過端令病骨驚遣愁聊覓句得句却愁生

送文黼叔主簿之官松溪

乃翁只解日爭暉不解塵中脫
馬鞵揚簿故應過習簿
建溪好處說松溪此行詩句何須覓
滿路春光總是題
飛上金鑾穩安脚竹林分付一鶯啼

送周仲覺訪來又別

酒邊詩裏久塵埃見子令人病眼開無夕不談談不睡
看薪成火火成灰小留差勝匆匆別欲去何如莫莫來
渠政功名我巖壑老身誰與共歸哉

休日晚步二絕

未須急訪社中狂且到西園探海棠今歲行春雖較晚
也勝雨裏度春光

晚雲欲雨又欲晴天借吾人作此行莫道行春無去處
山磬香裏聽溪聲

寒食前三日行脚遇雨

信脚那知遠雖勞亦快哉如何寒食近無數野花開碧
草望中去黑雲頭上來吾行吾自返雨子不須催

和張器先十絕

舊聞我里子張子七字端能出六奇窮巷有門無剝啄
怪來佳客肯差池

向來一別十番秋消息中間風馬牛只道故人霄漢去
不應林壑小淹留

誰云涸轍困波臣
合脫青鞋立縉紳
寄與有司高着眼
後來文格待渠新

我自窮愁坐綴文
何堪見子可憐生
兩窮政好同詩社
一戰猶須倩酒兵

散盡千金買盡書
短檠兩夜趁三餘
相如自倚多文富
不問家無擔石儲

不隨俗子作蠅營
深入書林寄此生
已與杜郎爭筆陣
更傳侯喜有詩聲

漏黃官柳已垂墻
針水公畦未種秧
多謝詩人來得得
踏開三徑雨中荒

老夫端欲買江天
抹月批風嚙聖賢
他日君來相問當
南溪溪北北山前

學成不必要心齋
眼到前脩脚自偕
挽住春風還獨笑
更無一物可裝斜

臺家搜遍北山萊
傾國如君不用媒
次第幽人出空谷
鶴書即傍日邊來

挽鄭恭老少卿

天不遺耆老人誰尚典刑向來卿月白無復史天青詩
派回風雪心源貝葉經故應書帶草和露泣康成

和濟翁惠詩

語妙渾忘夜杯行未厭頻平生憎俗子勝處要吾人已
結詩中社仍居族裏親酒邊不着句何許見天真

文遠叔挽辭

氣爽塵埃外川行翰墨間匆匆不白首去去忽青山琴

在絃安用人亡鶴不還竹林有前約欲語淚先潛

雨中送客有感

不知春向雨中回只道春光未苦來老子今晨偶然出
李花全落鄭花開

題謝昌國金牛煙雨圖

金牛煙雨最相關老子方將老是間不分艮齋來貌取
更於句裏占江山

春日六絕

遠日隨天去斜陽着樹明犬知何處吠人在半山行
春醉非關酒郊行不問塗青天何處了白鳥入空無
霧氣因山見波痕到岸消詩人元自懶物色故相撩
江水夜韶樂海棠春貴妃慙懃向春道莫遣一花飛
日落碧簪外人行紅雨中幽人詩酒裏又是一春風
春色有情意桃花生暮寒只應催客子不遣立江干

和濟翁弟惠詩

竟歲不得面移書焉用頻我方得吾弟今豈有斯人海

內友非少談間子獨親醉餘無浪語尤見醉中真
相思何所似飢者食仁頻此客非常客詩人太逼人黃
初那足過子建巧能親臺閣俱知己誰能薦子真

夏夜追涼

夜熱依然午熱同開門小立月明中竹深樹密蟲鳴處
時有微涼不是風

暑雨後散策

溪南稻子似溪北雨後山青非雨前芒屨泥深涼不淺

今年六月箇般天

夏月頻雨

一番暑雨一番涼真箇令人愛日長
隔水風來知有意為吹十里稻花香

新秋盛熱

度夏今年未覺難那知秋熱止無端
晚林不動蟬聲苦蟬亦無風可得餐

送慶基叔往上猶二絕

南溪不住住猶溪別駕賢孫法掾兒莫以甘棠南國陰
便忘萱草北堂詩

六十慈親路一千郎君歸省又何年贈行句子真聊爾
且折垂楊當贈鞭

初秋暮雨

禾穗輕黃尚淺青村巷已報隔林聲忽驚暮色翻成曉
仰見雙虹雨外明

濟翁弟贈白團扇子一面作百竹圖有詩和

以謝之

月波初上湧寒金
桂樹風來細有音
特地此君偏作惱
為儂隔却半輪陰

秋日晚望

村落豐登裏人家
笑語聲溪霞晚紅
濕松日暮黃輕只
磨秋殊淺如何氣
許清不應久閒散
便去羨功名

秋夜讀書

穉子慵都睡先生
喚不應蟲聲窓外
月書冊夜深燈半

醉聊今古千年幾廢興有懷人未會不樂我何曾

睡起理髮

老態隨年覺新涼與睡謀鵲驚茅屋曉臂冷葛衣秋遠
嶺元無約開門便見投閒中多事在一日一梳頭

暮歸

山色偏宜暮桐聲小作秋人行溪側畔天在樹梢頭學
嬾真成嬾知休却得休遣愁愁不去愁盡自無愁

曉望

暑退誰當憶秋生喜此逢荒林失輕霧寒日上危峯忽
有吟邊興忘看鏡裏容不須無鮑謝始得擅詩宗

午睡起

過雨餘秋暑移床揀午涼小風吹醉面凜氣忽如霜日
脚何曾動桐陰有底忙倦來聊作睡睡起更蒼茫

和胡季永赴季文遊園良集之韻聊以致私
怨於獨往云

有酒招元亮無漿饋子居何曾不三速焉用一行書乞

飲殊無分干時不已踈猶應慰大嚼玉軸到吾廬

四美堂

義山禾水在處在明月清風無地無光祿子孫寧底巧
不應造物獨私渠君不見謝家名子取四字段家作堂
兼四美主人自有筆如椽何用慙懃問楊子

秋晚過泉口

日色全無熱秋涼不似初行人驚翡翠掠水度芙蓉平
野一回顧遠山千有餘誰令貪眺望却道廢看書

豐山小憇

歸路元無遠行人倦自遲
野香寒蝶聚秋色老楓知
得逢清蔭休休憇片時
江山豈無意邀我覓新詩

過劉村江

波走痕痕日江呈岸岸秋
清流堪數石淺涉不須舟
野菊知何喜迎風舞未休
歸途愁欲暮未暮我何愁

寄蕭仲和

貧裏端何好欣然肯卜居
詩臞將到骨室陋得關渠
我

嬾今仍老誰能強著書談間可無子獨判一秋虛

題劉朝英進齋

燈火三更雨詩書一古琴惟愁脚力軟未必聖門深莫
笑雲端樹初如澗底針不應將一第用破半生心

題王季安主簿佚老堂

造物那能惱我曹軟紅塵裏漫徒勞是中却有商量處
且道青原幾許高

布韞青鞋已嬾行不如宴坐聽啼鶯只言此老渾無事

種竹移花作麼生

和王元駒

向來淮海說三秦
腳踏蘇門最絕塵
莫道江山歇英氣
如今文物有斯人
黃埃九陌誰知子
青竹千年獨問津
未得相看已相識
只慚空嘆蜀莊珍

題丘成之司理明遠閣

決曹據案塵似海
高閣退食心如冰
夜將官本校家本
萬山圍裏短檠燈
能文未得傲能吏
好官不應博丁字

何時着脚最高層目送歸鴻揮綠綺

和謝昌國送韋俊臣相訪

芒屨為車不必巾天窮未害子能文謝家有句元無繼
枉却催詩頭上雲

歲晚出城

溫飽能消底奔忙自作癡平生脚已繭今日鬢將絲山
刻霜餘骨梅橫水底枝只嫌長落莫不道許幽奇

至鷓鴣洞

岸凍樹逾瘦日高林始明
瑶草密如積玉泉中暗鳴初
至心為動欲歸脚還停
江湖千萬峯穿儂兩鞋青如何
鷓鴣嶺咫尺來未曾

讀張忠獻公謚冊感歎

恩視韓兼趙名均獻與忠禮中非不極勲外若為同三
聖無多學千年僅一翁猶憐公議在拚淚泣秋風

寄張敬夫二首

作郡纔佳政留中即好音
還將著書手拈出正君心
嶽

麓風霜飽脩門雨露深登庸何恨晚廊廟要山林
工瑟曾緣利鳴琴豈負予髮於貧裏白詩亦病來疎知
已俱霄漢孤蹤且簿書三年知免矣一飽會歸歟

和張慶長懷麻陽叔二詩

舊雪纔追送新梅又作繁欣逢上林雁聊免管城冠酒
債多多在詩盟久久寒忽思十年事有枕不能安
自幼仍投老相懽不解愁政緣湖外別負却竹林秋佳
政真餘事聞人說甚休不應野水渡橫此濟川舟

送羅永年歸永豐

誰道三年聚能勝一別多歲寒知子可心折奈吾何所
喜如椽筆能揮却日戈老夫留病眼看子中文科

夜坐小集

霜餘雪後夜無風人在燈前梅影中玉作寒蔬冰作酒
詩人猶自怨天窮

和謝昌國送管相士韻

半世緣癡自作勞萬人爭處我方逃憐渠識盡公卿得

一馬歸來骨轉高

郭漢卿母挽詩

婦節今安仰斯人古有光雞鳴不知雨薺茂獨凌霜未
拜金花誥空悲玉樹郎藤輿簾感繡無復出萱堂

庚戌正月送羅季周遊學禾川

眼邊相識蠶樣密如子歲寒萬纔一我往西山子義山
老衰一別堪三年外舅陰功不知數諸孫大半廊廟具
學文先要學忍飢明年看子刺天飛

過秀溪長句

去年來此上巳日今年重來未寒食臨溪照影老自羞
慙愧春光尚相識秀溪何許好春容最是溪深樹密中
海棠開盡却成白桃花欲落翻深紅

題薦福寺

千山底裏着樓臺半夜松風萬壑哀曉起巡簷看題壁
雨聲一片隔林來

晚過黃州鋪二絕

數峯殘日紫將銷一片新秧綠未交道是今年春水小
漲痕也到岸花梢

僕夫已倦路猶賒脚底殘陽眼底佳綠錦堆中半團雪
千楓擁出一桐花

誠齋集卷五